

Chapelles couvertes de bois & de chaume, on il y avoit cert ains Idoles en fort bel ordre en forme de femmes. Les habitans y estoient richement & proprement accoustrez avec chemises & mantelines de Coton blanc & couloure, & ornemets, ioyaux, & pendants de pierreries en Or & argent, & les femmes couvertes depuis le milieu iusqu'en bas, ayans aussi la teste affublee & le sein. Delà ils passerent à vne autre pointe nommee Cotoche, ou ils rencontrerent quelques Pescheurs, qui de crainte & frayeur prindrent la fuite vers terre, crians Cotehe, Cotehe, qui est à dire, à la maison, à la maison, cuidans qu'on s'enquist de leur pays pour y aller: d'ou la dite pointe a prins son nom. Ils y trouverent au bord de la mer vne fort grande Ville, laquelle à raison de sa grandeur ils nommerent Alkair, du nom du grand Caire Ville d'Egypte, combien qu'il n'est pas croyable qu'elle soit si grande qu'on dit: & y furent receus des habitans fort amiablement, s'esmerveillans des maisons basties avec hautes tours, des temples assez magnifiques, des rues pavees & grand trafic & commerce: les maisons y estoient basties de pierres & de chaux, mais couvertes de chaume & herbages: les chambres y sont hautes de dix ou douze degrez. Quant au peuple il est vestu non de laine car il ne s'y trouve point de brebis, mais de Coton en diverses sortes fort bravement & monstrueusement couloure. Les femmes pareillement y sont couvertes depuis le milieu iusques aux pieds, & couvrent leur teste & leur sein de divers linges, & sont soigneuses aussi leurs iambes & pieds pour ne les laisser voir: Vont diligemment aux temples: les plus riches, & notables pavent les rues de leurs propres pierres depuis leurs maisons iusques aux Temples: ils adorent les Idoles, & leur font offrandes d'hommes, toutesfois ne sont pas mangeurs de chair humaine. Ils sont circoncis, sans qu'on puisse sçavoir d'ou ils ont ceste coustume. En leur trafic ils sont droits & loyaux: negotient sans argent, trocquans leurs marchandises a autres choses, notamment du Coton & a des accoustrements de Coton, qui est la principale taille qu'ils apportent à leurs Seigneurs, & qu'ils portent à Mexico, Cap de Honduras, & Cuba. Ils ont aussi abondance d'abeilles, de miel & de cire, laquelle ils ne sçavoient pas mettre en v'sage devant la venue des Espagnols. Ils n'ont nulles mines d'Orny d'Argent, iacoit que le pays soit rude & pierreux il ne laisse pas d'estre fertile en Maiz ou Bled de Turquie, & abondant en poisson. A la venue des Espagnols il y avoit plus de quatre cents mille habitans desquels à peine en est il resté huit mille, tant ont ils esté oppressez par les Espagnols, qui en ont fait mourir vne partie, & ont reduit le reste en vne miserable servitude les vendans & transportans en d'autres lieux pour y fouir & chercher de l'Or: autres se sont retirez es bois pour eschapper des mains des Espagnols.

Pointe de
Coreche.

Grâde Vil-
le nommee
Alkair

Mœurs &
religio des
habitans
d'Alkair.

Destructio
des habi-
tans.

Guatimala.

La Ville de
Guatimala
ruinee par
orage.

AV Pays de Iucatan devers terre est frontiere la Province de Guatimala, là ou il y a eu vne Ville de mesme nom laquelle fut entiere-ment ruinee par continuel orages de pluyes & tempeste le huitiesme de Septembre 1547. & y perirent entre autres environ six vingts Espagnols. Le iour devient que ce malheur advint quelques Indiens allerent vers l'Evesque de la dite Ville nommé Francisco Maroquin, luy signifier que deffous de la montagne au pied de laquelle estoit assise la Ville, on oyoit vn si estrange & horrible bruit que rien plus: dequoy l'Evesque les reprit leur disant qu'il les avoit souvent adverti de ne point s'arrester à telles choses. Or peu apres environ deux heures apres minuiet, telle quantité d'eau vint à faillir de la montagne quelles emportoit de fort grandes pierres.